



EDITORIAL

Dugmukon ang hayop nga si Duterte

Natalana na nga lampasan sang rehimeng Duterte ang tanan nga nagagi nga reaksyunaryong rehimen sa talaksan sang korapsyon, pagpang-abuso, pagpamigos kag pagtraidor sa sulod lang sang apat ka tuig. Sa idalom sang iya tiraniko nga pagginahum, nagkuripon sang sobrasobra nga manggad kag kagamhanan ang hayop nga si Duterte, lakip man ang iya mga suluguon nga burukrata kapitalista kag burgesya kumprador kag iya mga dumuluong nga imperyalistang amo.

Samtang nagabuy-unan ang mga nagahari, subsob naman sa tuman nga kaimulon kag pag-antus ang nagakalisod nga pumuluyo nga Pilipino. Halin 2016, sige-sige nga nagsadsad ang pangabuhian sang banwa—sang mga mamumugon, mangunguma, malaproletaryado, petiburges kag pungsodnon nga burges. Pabudlay kag pasakit ang dala sang mga polisiya nga dikta sang dumuluong nga mga daku nga kapitalista kag bangko. Pinakaulipon ang kahimtangan sang masang anakbalhas. Ginpiang sila sang lapnagon nga disempleyo, manubo nga sweldo kag kita, kawad-on sang duta, nagatinaas nga presyo sang mga balaklon, pabug-at nga buhis, ka-

wad-on sang puluy-an, balatian kag nagagaruk nga serbisyo sa ikaayong lawas kag pangkatilingban.

Nagakuripon sang manggad ang pila lang samtang haggmak kag indi basta makatindog sa kaugalingon nga tiil ang ekonomya sang Pilipinas. Samtang ginalumos ang banwa sa dagat sang dumuluong nga pautang, nagatimbuok naman ang ginahugakom nga ganansya sang mga burgesya kumprador kag dumuluong nga mga daku nga kapitalista. Indi basta mabusog ang mga manughukhok kag manugdambong sa dunang manggad kag kusog sang Pilipinas; samtang naganiwang naman ang pungsod nga atrasado sa agrikultural nga produksyon kag

wala gid sang mga kinahanglanon nga industriya.

Labi nga naagnas ang pungsodnon nga soberanya sang Pilipinas bangud sa pagsurender sa mga kinamatarung sang pungsod sa atubang sang nagapasingki nga pagpandambong kag palumbaanay militar sang magkaribal nga imperyalistang US kag China. Kabaylo sang pila ka bilyon nga dolyar nga promisa nga pautang, suhol, kag personal kag pangpulitika nga pabor, ginsurender ni Duterte ang teritoryo sa dagat kag duta sang Pilipinas, ginapabay-an ang China nga waskon ang manggad-dagat, kag dingutan sang pangisdaan ang mga mangingisda nga Pilipino. Kabaylo sang padayon nga suporta militar kag pangpulitika sang US, gintapos ni Duterte ang sugilanon pangkalinungan kag nangako nga lutuson ang rebolusyonaryo nga kahublagan. Ginbawi niya ang paltik nga pamahug nga ibasura ang Visiting Forces Agreement kag padayon nga

ginasulong ang kontra-pumuluyo nga kampanya kontra-insurhensya.

Sa ibabaw sang banwa nga nagakalisod, nagapungko sa trono ang hayop nga si Duterte. Sa idalom sang apat ka tuig nga pagginahum, gingamo ang Pilipinas sa krimen kag korapsyon sang mga nagahari nga burukrata kapitalista. Ginbalsa ang pondo sang banwa kag ginakwartahan ang mga kontrata sa imprastruktura. Ginapaburan ang mga negosyo nga makahibalo “makisama” samtang ginaipit ang mga nagabalibad nga magduko sa iya malaut nga gahum. Ginapalibutan niya ang kaugalingon sang mga ginbusog nga upisyal sang militar agud depensahan siya batuk sa iya karibal.

Sa nagtaliwan nga apat ka tuig, ginhalitan ang banwa sang walay patugsiling nga mga terorista nga gera batuk sa pigos kag nagaantus. Pila ka libo ang ginpatay sa paltik nga “gera kontra droga” agud paludhon kag pasundon ang mga sindikato. Pila ka pulo ka libo ang ginhalitan sang pagguba kag okupasyon militar sa Marawi City kag nagapadayon nga gera batuk sa pumuluyong Moro. Wala-tuo ang ka-

pintas, pagpamatay, madamuan nga pagkugmat, pagpaniplang, kag pagpigos sa demokratiko nga kinamatarung ang dala sang gera batuk sa banwa sa tabon sang anti-komunismo. Sunud-sunod nga ginpatuman ang layi militar sa Mindanao, Memorandum Order 32 kag Executive Order 70 agud ipapanaog sa bilog nga banwa ang layi militar.

Sa pagpirma sang ginatawag nga “Anti-Terrorism Law,” naging tungtong subong sa iya ulo ang korona sang nagahari-harian nga diktador. Uyat niya subong ang layi nga nagahatag sa iya sang poder nga gamiton ang bug-os nga kabangis sang terorismo sang estado agud kugmaton, tapnaon o lutuson ang sin-o man nga kritiko o pangontra. Paagi sa layi nga ini, ginangkon ni Duterte ang mga gahum nga lampas sa gintalana sang 1987 konstitusyon. Ginalapakan sang layi nga ini ang mga basehan nga kinamatarung sibil kag pangpulitika.

Ginasakuan ni Duterte ang iya iskema sa pagtukod sang isa ka pasista nga diktadurya samtang ang bug-os nga banwa nagaantus sa pandemya nga Covid-19. Ang palya-

do nga militarista nga sabat sang iya gubyerno sa pamahug sa ikaayong lawas pangpubliko nagresulta sa padayon kag madasig pa nga paglapta sang bayrus sa bilog nga pungsod. Pagkatapos ang atrasado nga paghulag, palyado nga pagpanghanda kag pagpalig-on sang sistema sa ikaayong lawas, ginpapanaog ni Duterte ang militarista nga lockdown agud kontrolon ang bilog nga populasyon bilang pangunahon nga solusyon sa pandemya kag bilang pagpanghanda sa mga pag-istrikto sa idalom sang pasista nga areglo.

Gin-usikan niya ang sakripisyo kag kabudlay sang banwa bangud wala man siya sang ginhimo nga tikang agud himuon ang *mass testing* kag malaparan nga *contact tracing*, pagpabaskog sang mga laboratoryo kag libre nga pagbulong sang mga nagabalatian sang Covid-19. Sa baylo, gindambong ang binilyon ka piso sa maanomalya nga pagbakal sang mga kagamitan, gingutom ang banwa, kag ginguba ang ila mga pangabuhian. Maathag gid subong sa banwa, si Duterte ang numero uno nga pamahug sa ila ikaayong lawas kag kaluwasan sa tunga sang pandemya.

Sa atubang sang malapad nga pag-antus kag pagkapigos, nagawas ang kaakig sang bilog nga banwa kay Duterte. Mabaskog ang ila paghandum nga dugmukon ang hayop kag tapuson ang iya malaut nga pagginahum. Determinado sila nga tapuson ang pagginahum ni Duterte sa labing madali nga panahon kag pasabton siya sa tanan nga krimen batuk sa banwa kag sangkatawhan.

Tapos na ang panahon sang pag-antus kag pagkamahuyaon. Ginapanngibabawan nila ang kahadlok kag ginatipon ang kalig-on sang buot agud ululupod maghulag kag magbato. Nangin mas maisog sila sa paghambal kag pag-insister sang ila panawagan nga magpanaog o patalsikon si Duterte. Malapad nga kubay subong sang nagkalainlain nga mga demokratiko nga pwersa ang naghugpong batuk sa iya tiraniya. Samtang labing nagadaku ang ginatipon nga gahum kag manggad sang hayop,

“Dugmukon...,” sundan sa pahina 3



Tuig LI No. 13 | Hulyo 7, 2020

Ang *Ang Bayan* ginabantala sa lenggwahe nga Pilipino, Bisaya, Iloko, Hiligaynon, Waray kag Ingles. Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

 [instagram.com/prwcnewsroom](https://www.instagram.com/prwcnewsroom)

 [@prwc_info](https://twitter.com/prwc_info)

 cppinformationbureau@gmail.com

Kaundan

Editorial: Dugmukon ang hayop nga si Duterte	1
IATF, palpak sa pagtapna sa Covid-19	4
“Aktibista, indi terorista”	5
31 raliyista, gin-aresto	5
Bag-o nga saylo nga batalyon, ginbunalan	5
Paghanas militar sa Samar	6
Pagbinuligay sa tunga sg pandemya	6
8 mangunguma, ginpatay sa sulod 8 adlaw	7
Tagapahayag sg UN, batuk sa <i>Terror Bill</i>	7
Iloy kg lapsag, ginbalik sa kulungan	7
Report sg mga paglapas sa kinamatarung	8
Nakapokus nga operasyon militar sa Leyte	8
Brutalidad sa Caraga, magalala	9
Kasaysayan sg pagkaulipon sg mga Itom	9
Pagpanulsol sg gera sa SCS	10
Pasidungog kay Comrade Zia	10
10,000 nagtipon sa base sg CPI-Maoist	10
Pagpasidungog kay Kaupod Jaime Soledad	10

Ang *Ang Bayan* ginabantala duha ka beses kada bulan sang Komite Sentral sang Partido Komunista ng Pilipinas

"Dugmukon...",¹ halin sa pahina 2

labi siya nga nahamulag sa pumuluyo. Mabangis man kag poderoso, wala sang ikasarang ang hayop sa kusog sang nagahiliusa nga banwa.


Ginabuyok sang Partido ang tanan nga demokratiko nga sahi, sektor kag grupo nga magtindog, magorganisa kag tukuron ang malapad nga paghiliusa agud lubos nga ipakigbato ang ila mga kinamatarung, batuan ang terorismo sang estado, korapsyon, pagpaantus kag pagpangluib sang rehimeng Duterte sa banwa. Dapat sila maglunsar sang mga daku nga martsa kag rali sa dalanon kag tigayunon ang nagka-

lainlain nga porma sang pagbato agud tipunon ang kusog sang banwa kag ang kagamhanan nga bag-uhon ang dalagan sang kasaysayan.

Sa atubang sang nagasingki nga terorismo sang reaksyunaryo nga estado, dapat lubos nga pangapinan sang Bagong Hukbong Bayan (BHB) ang banwa batuk sa terorista nga atake sa iya mga kinamatarung. Samtang padayon nga ginaprayoridad sang BHB ang paghatag sang serbisyo sa ikaayong lawas kag pang-ekonomya sang banwa sa atubang sang pandemya nga Covid-19, dapat sabton sang mga yunit sini ang paghandum sang banwa para sa

katarungan kag silutan ang mga pasista nga terorista kag pabayaron sa ila mga krimen batuk sa pumuluyo.

Ang wala tupong nga pag-antus sang banwa sa idalom sang rehimeng Duterte salaming sang permanente nga krisis sang garuk nga sistema sa Pilipinas. Ginatum-ukan sini ang kakinahanglanon nga isulong ang pungsodnon-demokratiko nga rebolusyon agud waskon ang naganaknak nga sistemang malakolonyal kag malapyudal, agumon ang pungsodnon nga kahilwayan kag demokrasya sang banwa, kag tukuron ang hilway, progresibo kag mauswagon nga buasdamlag. **AB**



Pila sa mga matingkad nga anti-demokratiko

kag kontra-pumuluyo nga kinaiya kag probisyon sini ang masunod:

Anti-Terror Act of 2020

Labaw nga malabo ang pakahulugan sang terorismo. Suno sa layi, terorismo ang “kugmaton ang publiko,” “magtuga sang kahadlok,” “dabukan ang gubyrno o impluwensyahan ini gamit ang kahadlok: o “seryoso nga tay-ugon o samaron ang sandigan nga istruktura sa pulitika, ekonomya kag katilingban” kag iban pa.

Ang mapamatud-an nga nakasala sang terorismo pagasilutan sang tubtub-buhi nga pagkabilanggo nga wala sang benepisyo sang parole.

Lakip sa “terorismo” ang anuman nga buluhaton, nahimo na o bisan ginaplano pa lang:

Anuman nga buluhaton nga “may tuyo nga magpatay o maghalit sa sin-o man,” “magsamad sa pasilidad pangpubliko o pribado nga propyedad” o “magsamad sa kritikal nga imprastruktura.” (tubtub-buhi)

“Pagpamahug nga maghimo sang terorismo” (12 anyos)

“Pagplano, paghanas, pagpreparar o paghatag-dalan sa terorismo” lakip ang paghanda sang dokumento.”

“Pagpakighimbon nga maghimo sang terorismo” (tubtub-buhi)

Panugyan nga maghimo sang terorismo” (12 anyos)

“Pagsulsol nga maghimo sang terorismo sa porma sang paghambal, pagsulat o pagdrowing” (12 anyos)

SEKSYON 25

ginhatagan sang awtoridad ang pagatukuron nga Anti-Terrorism Council nga magdeklarar kon ano kag sin-o man nga mga indibidwal, organisasyon o asosasyon, lokal o dumuluong, ang “terorista” kag ang pag-freeze sang ila mga propyedad, nga wala sang pagpahibalo o proseso nga hudisyal.

SEKSYON 29

pag-aresto sa mga indibidwal nga ginasuspetsahan pa lang nga magahimo sang mga “krimen sang terorismo,” nga wala sang mandamyento. Ginasaad man sa probisyon nga ini ang pagpalawig sang detensyon nga wala sang mandu ang isa ka huwes, kag wala sang kaso nga ginpasaka sa korte, sang halin sa anay maksimum nga 36 oras nga gintalana sang Sandigan nga Layi magalawig sang 14 tubtub 24 adlaw nga paghunong sa isa ka suspetsado.

IATF, palpak sa pagsugpo sa Covid-19

Malayo pa ang Pilipinas sa pagtapna sa pandemya nga Covid-19 pagkatapos ang halos apat ka bulan sa idalom sang Bayanihan To Heal as One o Bayanihan Act. Nagataas gihapon ang numero sang mga nagapositibo sa bayrus. Sang Hulyo 6, masobra 46,000 na ang may sakit nga Covid-19 sa pungsod. Wala pa nalakip diri ang ginasilang 8,000 kaso nga nagapositibo pero nagahulat sang kumpirmasyon halin sa Department of Health..

Palpak si Duterte kag iya mga heneral sa Inter-Agency Task Force for Emerging Infectious Diseases (IATF-EID) nga tapuson ang paglapta sang bayrus. Ang ginapalapnag sini nga mga datos bungibung, sayup, atrasado, kag sa sini wala sang pulos sa pagmapa sang pandemya. Limitado gihapon ang ginahimo sini nga *testing* (14,000/adlaw, wala pa sa katunga sa ginpangako nga 30,000/adlaw sa katapusan sang Mayo). Mahinay gihapon ang ginatigayon sini nga *contact tracing*. Dugang nga pulis kag mga tropa sang AFP ang nangin sabat ni Duterte sa pagtaas sang numero sang mga nalatnan sa Cebu, sa baylo nga dugang nga pondo kag mamumugon medikal.

Malala pa, ginpalapta sang IATF ang bayrus sa mga prubinsya sang basta gilayon sini ginpapauli ang mga naistranded sa Metro Manila nga wala sang husto o sobra ka atrasado nga pagpagwa sang resulta sang pag-eksamen para mapat-ud nga indi nila dala ang bayrus. Wala man sang ginhimo ang IATF para ihanda ang mga ospital kag pasilidad pangkwantina nga magasalo sa ila sa mga prubinsya. Sang Hulyo, nagtuhaw ang walo ka bag-o nga “hotspot” sang bayrus nga dala sang mga nag-uli halin sa Metro Manila kag Cebu.

Tubtub subong, tuman ka kabos gihapon ang ayuda sa mga nadulaan sang trabaho sa *lockdown*. Sa halos P3 trilyon nga gin-ako kag gin-utang ni Duterte, gamit ang Bayanihan, 31.5 milyon nga pamilya pa lang ang nahatagan sa una nga serye sang ayu-

da sang Hunyo 29. May P186 bilyon pa lang sa P272 bilyon ang napanagtag sa mga lokal nga guberno. Samtang, wala pa sa katunga o P14 bilyon sa P30 bilyon nga pondo ang gingamit sini sa badyet sa ikaayong lawas.

May 3.1 milyon nga mamumugon lang ang nahatagan sang ayuda, bisan masobra pito ka milyon ang nadulaan sang trabaho, temporaryo man o permanente, bangud sa *lockdown*. Sa sarbey sang Mayo, naglab-ot sa 5.4% sang mga mamumugon o 4.1 milyon ang naistranded sa nagkalainlain nga bahin sang pungsod. Pinakadaku sini ang sa Metro Manila (490,000). Madamo sa ila ang nagaantus bangud sa pabag-o-bag-o kag arbitrario nga polisiya sang IATF sa pagbyahe. Ginabatyag nila ang kahimtangan nga wala sila sang kwarta, wala sang ginabaton nga ayuda, wala sang masilungan, wala sang makaon kag wala sang posibilidad nga masudlan o mapangitan-an.

Nakapaidalom gihapon sa nagkalainlain nga lebel sang *lockdown* ang pungsod. Ang Pilipinas ang may pinakamalaba kag pinakamapintas nga *lockdown* sa bilog nga kalibutan. Padayon ang pag-istrikto sa pumuluyo pero halog naman pabor sa pila ka negosyo, ahensya kag sektor.

Limitado gihapon

sa mga mamumugon sang “esensyal nga mga negosyo kag serbisyo” ang ginatugutan nga maggwa sa tanan nga tipo sang “kwantina”. Ginpat-ud sini ang nagapadayon nga operasyon sang dumuluong nga mga negosyo nga BPO, pasugalan, konstruksyon, manupaktura kag mga daku nga *mall*.

Limitado gihapon ang publiko nga transportasyon bisan madamo na ang ginpabalik sa trabaho. Sining Hulyo, walo pa lang sa kada 100 tradisyunal nga dyip sa Metro Manila ang gintugutan magbyahe. Ini bisan mas luwas ang nasambit nga mga dyip kumparar sa mga bus, *van* kag “moderno” nga dyip nga sarado kag sa sini mas daku ang posibilidad sang paglapta sang bayrus sa mga pasahero.

Arbitraryo nga ginakulong gihapon sa ila mga balay ang mga pamatan-on nga 21-anyos panubo. Mayorya sila sa 30 milyon nga gindingutan sang kinamatarung sa edukasyon kag trabaho nga dulot sang pabag-o-bag-o kag kontra-imol nga plano sa edukasyon kag pagbukas sang mga eskwelahan.

Halin Marso 7 tubtub Mayo 31, naglab-ot na sa 188,348 ang gindakup sang mga pulis bangud sa mga “paglapas sa kwantina”. Masobra 57,700 ang ginkasuhan kag 23,377 ang ginpabayad sang multa.

Ginkwestyon man sang pila ka mga abugado ang ligalidad sang *lockdown*, ilabi na sang mga restriksyon sini sa negosyo, byahe kag hulag sang pumuluyo. Siling nila, baliskdad sa gintalana sang 1987 konstitusyon ang pagpanaog sang pagdumili sini. Sala ang opinyon nga nakasaad ini sa Bayanihan bangud wala sang amo nga partikular nga mga probisyon sa layi. Labi nga nadulaan sang ligal nga tungtungan ang mga restriksyon sa pagbyahe, pagtilipon kag *curfew* pagkatapos madulaan sang gahum ang Bayanihan Act sang Hunyo 24.



"Aktibista, indi terorista"

Nagtipon ang 1,500 aktibista sa University of the Philippines sa Diliman, Quezon City sang Hulyo 4, isa ka adlaw pagkatapos pirmahan ni Rodrigo Duterte ang Republic Act 11479 o ang ginatawag nga layi kontra-terorismo. Ginpangunahan sang Movement Against Tyranny kag Bagong Alyansang Makabayan ang protesta, upod ang nagkalainlain nga organisasyon nga pung-sodnon-demokratiko.

Nakig-isa sa mga raliyista ang iban pa nga mga grupo nga batuk sa layi, lakip ang mga lider sang tradisyunal nga oposisyon. Naghimo man sang mga protesta sa Bacolod City, Cavite, Laguna, Cagayan, mga Pilipino sa Hong Kong, kag bisan sa atubang sang Philippine Embassy sa Washington DC, US.

Ginpirmahan ni Duterte ang hagna sa pihak sang malapad nga pagpamatuk sang pumuluyo.

Kaangut sini, nagsumiter na sang apat ka petisyon sa Korte Sup-

rema ang mga progresibo nga kongresista, abugado kag akademi-ko para ibasura ang layi nga ini. Natalana nga mangin epektibo ang layi sa Hulyo 19.

Nagprotesta man ang mga mamahayag sang Hulyo 3 sa Quezon City bilang suporta sa panawagan nga ibalik sa ere ang ABS-CBN. Nagkadto sa upisina sang Commission on Human Rights (CHR) ang mga raliyista. Natalana nga magpagwa sang desisyon ang Kongreso kaangut sa pagpalawig sang

prangkisa sang kumpanya sa Hulyo 7.

Antes sini, nagprotesta man ang Kilusang Mayo Uno sa CHR sa okasyon sang ika-apat ka tuig ni Duterte sang Hunyo 30. Naghigda sila sa atubang sang upisina bilang simbolo sang pagkapatay sang basehan nga mga kinamatarung kag pangabuhian sa idalom sang rehimen. Ginpukpok man sang Kilusang Magbubukid ng Pilipinas ang Department of Agriculture sa Quezon City para ipahayag ang kaakig sa kainutilan sang ahensya sa pagbulig sa mga mangunguma. Ginpakamaut man nila ang korapsyon sa ahensya, sa porma sang sobra-sobra nga pagpresyo sa abono nga ginpanghatag bilang ayuda sa panahon sang pandemya. AB

Bag-o nga saylo nga mga batalyon, ginbunalan

Napangibabawan sang Bagong Hukbong Bayan (BHB) – Eastern Samar (Sergio Lobina Command) ang atake sang bag-o nga saylo nga 78th IB sa Barangay Balingasag, Oras sang Hunyo 26. Nakumpiska sang mga Pulang hangaway halin sa mga suldado ang duha ka riple nga R4 sa engkwentro. Ginakumpirma pa ang report nga indi magnubo sa 10 suldado ang napatay sa inaway. Naghalin sa Leyte ang amo nga batalyon.

Gin-isnayp man sang BHB-Western Samar (Arnulfo Ortiz Command) ang 19th IB sa Sityo Galutan, Hagbay, San Jose de Buan sang Hunyo 1. Bag-o nga saylo man ang 19th IB halin sa North Cotabato. Ginbansagan nga “masaker batalyon” ang amo nga yunit sadtong panahon sang rehimeng Arroyo bangud sa kasingki kag kalala sang mga paglapas sini sa tawhanon nga kinamatarung. Una na ini nga nagtanom sang teror sa Leyte. Lakip sa mga krimen sini ang masaker sa walo ka mangunguma sa Palo kag masaker sa Kananga kon sa diin ginpatay ang siyentista nga si Prof. Leonard Co.

Samtang, ginpalukpan sang BHB-Albay ang mga tropa sang pulis nga nagaoperasyon sa Barangay San Isidro, Jovellar sang Hunyo 23 sang kaagahon. Sabat ini sang BHB sa nagapasingki nga atake nga ala-SEMPO sang Joint Task Force Bico-

landia. Isa ka pulis ang napatay samtang tatlo ang napilasan. Sang Hulyo 2, ginpalukpan sang BHB-Sorsogon ang kampo sang 31st IB sa Sityo Cabugaan, Barangay San Isidro, Bulan, Sorsogon.

Sa Negros Occidental, patay sa pagpang-ambus sang BHB ang isa ka elemento sang 62nd IB sa Sityo Compound, Barangay Luz, Guihulngan City sang Hulyo 2, ala-5 sang hapon. Nakumpiska halin sa iya ang isa ka kalibre .45 nga pistola. Nagaoperasyon sila sa mga baryo sang Central Negros nga ginadudahan nga nagasuporta sa BHB sa tabon sang Community Support Program (CSP).

Sa Antique, ginpalukpan sang BHB-Antique ang tropa sang 61st IB nga sakay sa duha ka salakyan pangmilitar sa Barangay Igbucagay, Hamtic sang tungang gab-i sang Hulyo 2. Apat ang napatay kag duha ang napilasan sa mga suldado. AB

31 raliyista, gin-aresto

TRAYNTA'Y UNO NGA RALIYISTA ang gin-aresto sa duha ka separado nga insidente sining nagligad nga mga semana. Ginlunsar ang mga protesta para pamatukan ang layi sa terorismo ni Duterte.

Mapintas nga gin-aresto sang mga pulis ang 20 LGBT (lesbyana, bakla, bisekswal kag *transgender*) kag ila nga mga tagasuporta nga nagprotesta sa ginkunsaran sang Mendiola sa Maynila sang Hunyo 26 bilang pagdumdom sa Pride Month. Ginpangunahan sang organisasyon nga Bahaghari ang paghulag sang mga LGBT batuk sa tiraniya sang rehimeng Duterte. Arbitrario nga gindetiner ang mga biktima sa sulod sang apat ka adlaw.

Sang Hulyo 4, gindakop man ang 11 aktibista sa Cabuyao, Laguna nga nagprotesta isa ka adlaw pagkatapos pirmahan ni Rodrigo Duterte ang Anti-Terrorism Law. Tapos na ang ila nga protesta sang balabagan kag arestuhon sila sang gintingub nga pwersa sang 2nd ID nga naka-*full battle gear* kag mga pulis sang Cabuyao. Gindala sila sa presinto kag ginkulong sang tatlo ka adlaw.

50 milisya, nakatapos sang paghanas-militar sa Samar

Nakatapos sa Batayang Kurso sa Pulitiko-Militar ang 50 myembro sang milisyang bayan sa isa ka prenteng gerilya sa Samar sang Abril. Mayor-ya sila sa 82 treyni nga nagkuha sang kurso. Ang 32 mga regular nga Pulang hangaway.

Halin sa lima ka baryo ang amo nga mga myembro sang milisyang bayan nga naghanas sa sulod sang pito ka adlaw. Anom ka instruktur ang naghatag sang kurso. Sa pagbuligay sang mga instruktur kag estudyante kag sa bulig sang malapit nga tsapter sang Kabataang Makabayan, nahiwat sang hilway ang

paghanas-militar.

Sa ginhimo nga pagtasa sang paghanas, madamo nga treyni ang nakit-an nga may potensyal nga mangin kadre-militar. Nakita ang determinasyon sang pumuluyo nga isulong ang inaway banwa sa kada-ku sang numero sang mga milisya nga nag-entra sa paghanas. Bisan

pa man, may nakita nga pila ka kahinaan sa mga treyni sa pagpatuman sang mga *drill* kag pila ka paghalog sa mga polisiya.

Hugot ang pagbuligay sang mga instruktur. Pareho sa anuman nga pagtuon, napangibabawan nila ang mga problema paagi sa mga pagtasa kada adlaw samtang ginahanda ang mga pagtulun-an. Lakip sa pagtinguha nila nga pasanyugon ang paghiliusa sa paghatag sang mga kumand sa panahon sang ehersisyo kag mga paghanas.

Kabahin ang paghanas sa pagtinguha sang kumand sa operasyon sang Bagong Hukbong Bayan sa rehiyon nga pataason ang ikasarang sang mga Pulang hangaway sa inaway, pareho ang mga pultaymer kag partaymer. Ini ang paghanda sa paglunsar sang mas maikit nga taktikal nga opensiba bilang sabat sa nagasingki nga kontra-rebolusyonaryo nga gera sang rehimeng Duterte. AB



Nagabuligay ang masa sa pag-atubang sa kabudlayan kag pandemya

Daku ang epekto sa mga mangunguma sang arbitraryo nga pag-istrikto sa paghulag nga ginmandu ni Duterte sa ngalan sang pagtapna sa Covid-19. Lakip sa mga apektado ang mga mangunguma sa Bicol nga wala pa makabawi halin sa kahalitan nga gindulot sang bagyo Tisoy sadtong nagligad nga tuig. Para makatuwang, ginalunsar sang mga rebolusyonaryo nga organisasyon sang mangunguma diri ang nagkalainlain nga inisyatiba sa tagsa-tagsa nila ka barangay.

Katuwang ang mga yunit sang Bagong Hukbong Bayan, ginpabaskog sang mga mangunguma sa Barangay Kawayan ang mga “grutul” o grupo sa binuligay sa produksyon. Bangud sa restriksyon, indi nila madali mabaligya ang ila produkto kag kon makalusot, tuman kanubo pa ang presyo. Nagalab-ot lang sa ₱600 ang mala nga palay kag ang bugas ara sa ₱1,500 kada sako. Para makatuwang sa gilayon nga mga kinahanglanon, nagtanom sang mga talamnunon ang mga grupo nga madasig nila mapatubo kag mapuslan. Ang sobra nga ani

sang mga grutul ginahatag sa ila mga kasilingan.

Sa Barangay Narra, nagorganisa ang sanga sang Partido sa lokalidad (SPL) sang operasyon *relief* kon sa diin 700 pamilya ang nahatagan sang tig-5 kilo nga bugas. Naglunsar man sang *feeding program* ang mga organisasyon sang mangunguma. Kadungan sini, nagpanagtag ang sanga sang mga pol-yeto nga nagaunod sang impormasyon bahin sa Covid-19.

Sa Barangay Lawaan, ginpaagi sa kultural ang kampanya nga impormasyon batuk sa Covid-19.

Naghimo ang mga mangunguma sang mga drama, kanta, rap, saot kag *jingle* bahin sa ila kahimtangan sa idalom sang pandemya. Gingamit nila ang mga ini sa mga treyning medikal, klinikang bayan kag mga miting sa komunidad.

Sa tanan nga mga erya, ginpa-taas sang Pulang hukbo ang kapasidad kag kinaalam sang mga residente bahin sa alternatibo nga medisina pareho sang akupangtura kag mga tanom herbal agud mapabilin ang ikaayong lawas, makalikaw sa Covid-19 kag iban pa nga balatian.

Natigayon ang mga aktibidad nga ini sa pihak sang mahulag nga operasyon kombat sang mga sulda-do sang AFP sa ila barangay. Determinado kag bug-os ang suporta sang mga mangunguma sa ila hukbo kon ngaa maayo sila nga nagsikreto, nagpatawag sang pulong kag nagpasa sang impormasyon sa BHB. AB

8 mangunguma, ginpatay sa sulod sang 8 adlaw

Walo ka mangunguma ang nagasulunod nga ginpatay sang mga armado nga elemento sang rehimen sa sulod lang sang walo ka adlaw. Tanan nga mga biktima malisyoso nga gin-akusar nga mga katapo o may kaangtanan sa Bagong Hukbong Bayan (BHB).

Ginpatay si Jose Jerry Catalogo, upisyal sang National Federation of Sugar Workers sang mga ahente sang estado mga alas-5 sang aga sang Hunyo 23. Nagapakaon sadto sang kalabaw ang biktima sang siya tiruhon sa gwa sang iya nga balay sa Barangay Paitan, Escalante City, Negros Occidental. Antes ang pagpatay, ginreport nga ginpaidalom sa pagpanilag si Catalogo.

Sa Northern Samar, gin-istra-ping sang 20th IB ang balay sang mangunguma nga si Zaldy Meraya sa Palapag, Northern Samar sang Hunyo 20. Napatay sa insidente si Meraya kag ang iya kaupod nga si Bebe Tobino. Pilason man ang iya anak nga si Jolina Calot nga katapo sang League of Filipino Students, iya nga asawa kag isa pa niya ka anak.

Sa Albay, ginpatay sang ginadudahan mga pulis ang mga aktibista nga sanday Elder Moina kag Jose

Arthur Clemente sa Barangay San Isidro, Jovellar sang Hunyo 24. Daan na nga nakabaton sang pamahug sa kabuhi ang duha.

Sa Masbate, ginpangtiro sang mga pulis sanday Rogen Orcales Languido, Danny Boy Tibay Pepito, Sr., kag menor-de-edad nga anak sa Barangay Mahayahay, Placer sang Hunyo 17. Ginransak sang mga pulis ang balay sang mga biktima kag ginkawat ang isa ka selpon.

Pag-aresto. Gin-aresto sang mga pulis ang pito ka Lumad sa Barangay Blanco, Balingasag, Misamis Oriental sang Hunyo 26. Sila mga katapo sang Kalumbay Lumad Organization nga nagapamatuk sa mapangdambong nga operasyon nga mina, pagpangtroso kag ekoturismo sa Mt. Balatukan.

Sa Negros Oriental, apat ka residente ang gindakop sang 62nd IB sa Barangay Luz, Guihulgan City sang Hulyo 4. Ginbakol ang mga

biktima kag gin-akusar nga may kahilabtan sa opensiba sang BHB sang Hulyo 2.

Pagpamilit. Pwersahan nga ginpagiya sang 4th MBLT kag SFC ang duha nga menor-de-edad nga Palaw'an sa 3-simana nga operasyon militar nila sa Palawan sang nagligad nga bulan. Ginsakop sang operasyon ang anom ka barangay sa mga banwa sang Brooke's Point, Rizal kag Bataraza. Ginkontrol sang mga suldado ang paghulag sang mga mangunguma kag ginpunggan sila nga magkadto sa uma.

Sa Barangay Aribungos, Brooke's Point, ginransak sang mga suldado ang mga kabalayan kag ginsamad ang pananom sang mga residente. Napilitan nga magbakwit ang 10 pamilya nga Palaw'an bangud sa operasyon. AB



9 nga tagapahayag sang UN, nagkontra sa terror bill

SIYAM NGA ESPESYAL nga komite kag tagapahayag sang United Nations ang nagsulat kay Rodrigo Duterte sang Hunyo 29 para ipabutyag ang ila nga eksperto nga opinyon kag pagkontra sa Anti-Terror Bill (subong Anti-Terrorism Law). Siling nila, ginalapang sang amo nga layi ang mga internasyunal nga pagsulundan sang mga kinamatarung sibil kag pulitikal, amo man ang Unibersal nga Deklarasyon sa mga Tawhanon nga Kinamatarung.

Partikular nga ginsambit sang mga espesyal nga tagapahayag ang mga probisyon sang layi nga nagalapas sa unibersal nga kinamatarung sa arbitrario nga pagpang-aresto kag detensyon, kahilwayan sa pamamahayag kag magpahayag kag kinamatarung para sa malinong nga pagtilipon. Siling nila, tuman ka lawig kag buron ang depinasyon sang terorismo sini. Liw-as ini sa ginasing sang mga upisyal sang rehimen nga "nagasanto" ang depinasyon sang layi sa internasyunal nga talaksan.

Ginpakamalaut man sang mga upisyal sang UN ang mga probisyon nga nagahatag sa sangay sang ehekutibo sang mga awtoridad nga nagakadapat sa mga korte, kawad-on sang husto nga proseso sa pagkiha, ang mga paglapas sa pribasiya kag sa arbitrario nga paglimita sa buhat sa kaluoy nga aktibidad nga ginadudahan nga nakabulig ini sa "terorismo."

Iloy kag 3-adlaw nga lapsag, ginbalik sa kulungan

WALA SANG KALUOY NGA GINBALIK sa Manila City Jail Female Dorm ang bag-o nga nagbun-ag nga bilangong pulitikal nga si Reina Mae Nasino, upod ang iya lapsag sang Hulyo 3. Tatlo ka adlaw pagkatapos magbun-ag si Nasino kag nagakinahanglan pa ang iya nga lapsag sang atensyon medikal bangud kulang ini sa bug-at. Lakip si Nasino sa mga lider sang progresibo nga organisasyon nga dululungan nga gin-aresto sa Tondo, Manila kag ginpasakaan sang himu-himo nga kaso sang Nobyembre 2019.

Tubtub subong wala pa ginaaksyunan sang Korte Suprema ang petisyon sang pamilya kag tagasuporta sang mga bilangong pulitikal nga hilwayon ang detenido nga mga tigulang, may sakit, nagabusong kag bag-o nga bun-ag. Balibad sang korte, indi makabuyahe halin sa Visayas ang huwes nga nakatalana nga magbista diri bangud sa *lockdown*.

Nakapokus nga operasyon militar sa Leyte

Nagkalainlain nga pamaagi ang ginahimo sang 802nd IBde para paggwa-on nga nalutos na sini ang Bagong Hukbong Bayan (BHB) sa Leyte. Mai-kiit ang ginalunsar sini nga mga nakapokus nga operasyon militar halin Marso tubtub Abril. Kadungan sini, nagpalapta ini sang disimpormasyon pareho sang himu-himo nga mga operasyon, engkwentro, o madamuan nga pagsurender.

Naglunsar sang operasyon kombat ang 78th IB sa indi magnubo sa 11 baryo sa mga banwa sang Mahaplag kag Abuyog sa Leyte, kag Sogod kag Bontoc sa Southern Leyte. Gin-okupar man sang mga suldado ang Pandan, Maligaya, kag Sta. Cruz sa Mahaplag, Pinamangan sa Abuyog, Kahupian kag Pancho Villa sa Sogod, kag Ulisihan sa Bontoc sa idalom sang Retooled Community Support Program (RCSP). Ginapahug, ginapatawag sa kampo militar kag pwersahan sini nga “ginapasurender” ang mga natumod nila nga lider-mangunguma. Ginabantayan sang mga suldado ang hulag sang mga residente, lakip ang pagkadto nila sa ulumhan.

Nagtukod ang mga suldado sang pabudlay nga mga tsekpyont sa haywey sang Hilongos, Mahaplag kag Sogod sa tabon sang kampanya kontra Covid-19. Paandam nila, pagapatyon ang sin-o man nga maggaagi sa tsekpyont nga positibo sa Covid-19.

Sa ikatlo nga distrito sang Leyte, masobra 100 tropa sang 93rd IB ang naglunsar sang masobra isa ka semana nga operasyon sa mga barangay sang Monterico, San Vicente kag Manlilinao sa Ormoc, kag Bulak sa Matag-ob. Sa iban nga bahin sang Ormoc, nagsimpon ang pwersa sang AFP kag PNP agud maghimo sang operasyon kombat sa mga baryo sang Biliboy, Donghol, Maha-

yag, Boroc kag Hugpat halin sang uhi nga semana sang Pebrero tubtub una nga semana sang Marso. Nagtukod man sang tsekpyont ang militar sa mga dulunan sang Ormoc kag Kananga.

Ara sa erya ang mga suldado bilang pwersa pangseguridad sang proyekto nga ekoturismo sang kongresista sang Leyte nga si Vicente Veloso. Magalapos halin Matag-ob tubtub Merida ang ginaplano nga resort nga magapalayas sa mga residente.

Nagakampanya man ang 802nd IBde sang peke nga pagpasurender paagi sa E-CLIP sa Carigara. Sa San Isidro kag Calubian, “ginpabugal” sang 802nd IBde ang 262 kuno nga mga anay rebelde sa madamuan nga nagsurender sang Pebrero. Ginbalsa sang mga upisyal sang brigada ang daku nga bahin sang P6,258,000 ayuda nga gintalana kuno para sa mga “surenderi.” AB

Report sang mga paglapas sa tawhanon nga kinamatarung

SA LISTAHAN SANG *Ang Bayan*, naglab-ot na sa 24,638 (o 135 kada adlaw) ang nangin biktima sang nagkalainlain nga tipo sang paglapas sa tawhanon nga kinamatarung halin Enero 1 tubtub Hunyo 30 sini nga tuig. Wala pa nalakip sa suma nga ini ang pila ka pulo ka libo nga arbitraryo nga paglapas bangud sa kuno nga paglapas sa *lockdown* sa panahon sang pandemya.

Sa sulod sang anum ka bulan, naglab-ot sa 46 aktibista kag sibilyan ang nangin biktima sang pangpulitika nga pagpamatay, samtang 425 naman ang gin-aresto kag gindetiner. Mga mangunguma ang kadaman sa mga ginpatay (32) kag gin-aresto (280). Mayorya sa ila ginpatay sa Bicol (14) kag gin-aresto sa North Central Mindanao Region (140).

Halin Marso 15, nakalista man ang *Ang Bayan* sang nagkalainlain nga porma sang pagpang-atake militar sa indi magnubo sa 625 barangay sang 247 banwa kag syudad sa 54 prubinsya kadungan sang pagpanghalit sang pandemya nga Covid-19. Ginreport sini ang 17 kaso sang pagpamomba, istraping kag pagpanganyon sa panahon nga ini, kon sa diin 15 natabo sa Mindanao. Nagresulta ang mga pagpang-atake nga ini sa pagbakwit sang indi magnubo sa 15,768 sibilyan. Pinakamadamo sa mga bakwit ang halin sa Western Mindanao (11,810).

Ang mabaskog nga opensiba batuk sa pumuluyo sa una nga tunga sang tuig 2020 direkta nga resulta sang kampanya kontra-insurhensya sang rehimen nga ginapangunahan sang mga armado nga gaway sini kag sang National Task Force to End Local Communist Armed Conflict (NTF-ELCAC).

Mga paglapas sa tawhanon nga kinamatarung (Enero-Hunyo 2020)

Pangpulitika nga pagpamatay	46
Tuyo nga pagpatay	21
Pag-aresto kg detensyon	425
Pagpaandam, pagpang-ipit, intimidasyon	3,292
Pagpabakwit	17,193
Pagguba sa propyedad	72
Iligal nga paghalughog kg pagkumpiska	46

Atakeng militar sa mga komunidad sa panahon sg Covid-19 (Marso 15-Hunyo 2020)

Barangay	625
Bayan	247
Prubinsya	54
13	Pagpamomba kg/o pag-istraping
4	Pagpanganyon

Lauman ang mas malaut nga brutalidad sang 901st IBde sa Caraga

Labi pa nga kalakasan kag paglapas sa tawhanon nga kinamatarung ang maagyan sang mga Caraganon sa pagsaylo sang berdugo nga 901st IBde, nga ginapamunuan ni Brig. Gen. Gabriel Viray, sa idalom sang 4th ID. Gin-anunsyo sang militar ang pagdeploy sang brigada sang Hunyo 16, sandig sa target ni Duterte nga “tapuson” ang Bagong Hukbong Bayan (BHB) sa tuig 2022. Natalana nga mag-operasyon ang brigada sa Surigao del Norte kag kaiping sini nga mga prubinsya.

Sa isa ka pahayag, ginmanduan ang brigada sang kumander sang 4th ID nga si Maj. Gen. Andres C. Centino nga “dugmukon ang BHB” sa rehiyon nga siling niya “ara sa bibi sang indi mapunggan nga pagbagsak”. Ang deklarasyon nga ini ang ginsam-bit man sang nagtaliwan nga mga rehimen sang ideploy ang mga ini ang 901st IBde sa Cotabato, Albay kag Catanduanes kon sa diin napaslawan ang brigada nga dugmukon ang huk-

bong bayan. Ang 901st IBde notoryus sa pagtarget sa mga sibilyan kag pagsabwag sang pasista nga teror, labi na batuk sa mga mangunguma kag aktibista agud pahipuson sila kag tapnaon ang ila pagbato.

Sa pagdeploy sini sa rehiyon sang Caraga, sigurado nga mas malala nga krimen ang pagahimuon sini.

Lakip sa pinakamalaut nga krimen sang 901st IBde ang magka-

sunod nga pagpatay sang mga tropa sini sa anum ka mangunguma sa Albay sang Enero 2010. Duha sa mga biktima sini gin-utdan sang ulo, isa ang ginsunog kag isa pa ginlas-las ang liog.

Subong nga tuig sa Cotabato, nagpadihut ang 901st IBde sang seremonya para sa peke kag mada-muan nga pagpasurender sang mga sibilyan agud paggwaon nga napa-daug sini ang gera batuk sa BHB sa Southern Mindanao kag mabulsa sang mga upisyal ang daku nga pondo para sa E-CLIP. Sang Marso, ginparada sang brigada ang indi magnubo sa 28 sibilyan nga siling nila mga “nagbalik-loob” nga Pulang hangaway kag “nakabaton” sa kabilugan sang P3.7 milyon. AB

Kasaysayan sang pagkaulipon sang mga Itom

Masobra isa ka bulan na nga sige-sige ang dalagku nga protesta sang hublag nga Black Lives Matter sa nagkalainlain nga bahin sang US. Ginasulong sini indi lang ang mga kinamatarung kag kaayuhan sang mga Itom sa subong kundi pati ang pagkay-o sa siglo-siglo nga pagpamigos kag pagpanghimulos sa ila sa US.

Una nga nag-abot sa naaminhan nga bahin sang kontinenteng America ang mga Itom bilang mga ulipon. Bisan sadtong ginabaligya ang mga Itom nga ulipon sa kontinente sadtong ika-16 siglo pa, ginakabig ang Agosto 1619 bilang umpisa sang pagpang-ulipon sa ila. Ini sang nag-abot sa Virginia ang isa ka barko nga sakay ang masobra 20 ulipon halin sa Africa. Sadto sakop pa sang Britain (UK) ang mga teritoryo sa US.

Nag-umpisa nga himuon nga ligal ang mga pagpang-ulipon sang 1641. Ang mga ulipon ginapatrabaho sa mga plantasyon sang tabako, palay, tubo, indigo kag iban pa. Gintalana sang layi sang 1654 nga tub-tob-buhi nga pagpanag-iya sang kapitalista nga agalon sa iya nga ulipon kag mga anak sini. Naagyan nila ang indi tawhanon nga pagpanga-

buhi kag brutal nga mga silot lakip ang paglatigo, pagbitay, pag-utod sang mga bahin sang lawas, pagpanglugos kag iban pa nga pagpamintas.

Sadtong ulihi nga bahin sang siglo 1700, 3.2 milyon nga ulipon nga Itom ginpatrabaho sa malapad nga plantasyon sang bulak. Paglabot sang 1860, sa bisperas sang moderno nga manupaktura, duha-satatlo sang suplay sang bulak sa bilog nga kalibutan halin sa trabaho sang ulipon.

Nagsulong ang hublag sa pagtapos sang pagpang-ulipon sa natabo nga gera sibil sang 1861. Upisyal nga gintapos ang pagpang-ulipon sang Hunyo 19, 1865, pero nagpadayon ang diskriminasyon kag rasismo sa mga mamumugon nga Itom.

Naglab-ot pa sang 99 tuig ma-



kaligad tapuson ang pagpang-ulipon sa mga Itom, antes ginkilala sadtong 1964 ang alalangay nga kinamatarung para sa tanan. Bunga ini sang malapad nga kahublagan sadtong dekada 1950 kag 1960 para sa kinamatarung sibil, amo man, ang pagsublak sang mga rebolusyonaryo nga asosasyon sang mga Itom.

Apang matapos ang masobra tunga sa siglo, indi pa lubos nga napanas ang diskriminasyon, pagpamigos kag pagpaantus sa mga Itom. Pana-panahon nagalupok ang mga malapad nga protesta sang mga Itom. Ang pila ka simana na nga protesta sa US sa diwa sang “Black Lives Matter” o “May Kahulugan ang Kabuhi sang mga Itom” ang pinakamalapad kag sustenido sa nagligad nga mga dekada. AB

Inter-imperyalista nga pagpanulsol sang gera sa SCS

GINPASINGKI NGA PAGPANULSOL sang gera ang ginahimo sang China kag US sining Hulyo sa South China Sea (SCS). Naglunsar sang serye sang *war games* ang China malapit sa Paracel Islands sang Hulyo 1-5 bilang pagpakita sang imperyalista nga kusog sini sa lugar. Ang Paracel Islands teritoryo nga ginaangkon sang Vietnam. Isa ka adlaw antes sini, naglayag sa kadagatan nga ini ang USS Gabrielle Giffords.

Kadungan sini, naglunsar ang US sang kaugalingon nga pagpakita sang kusog sa SCS. Ginatawag nga “pinakadaku sa tipo sini” ang ginlunsar nga *war games* sang US. Ginpasakupan ini sang USS Nimitz kag USS Ronald Reagan, pareho nga “nagalutaw nga base militar” kag mga eroplano nga pamomba nga naglupad halin sa mga erport sang US diri halin Hulyo 4. Antes sini, naghimo na sang duha nga ginsambit nga barko de-gera, upod ang isa pa—ang USS Theodore Roosevelt—sang *war games* sa sidlangan nga bahin sang Pilipinas. Nagapabilin ang USS Theodore Rossevelt sa bahin nga ini, samtang mako sa pagpakita sang kusog sang US sa South China Sea.

Ginlunsar sang US ang mga *war games* nga ini sa tabon sang pagpangapin sa “hilway nga paglayag” kag para makuha ang suporta sang mga pungsod nga nagapamatuk sa agresyong militar sang China.

Para sa US kag China, kabahin ang mga agresibo nga aksyon nga ini sa pagpusisyon sang gamit kag tropa kag pat-uron ang tagsa-tagsa nila nga mga estratehiko nga interes sa Asia-Pacific.

Comrade Zia, sulo sang sahing proletaryado sa Afghanistan

NAGPAHAYAG SANG PAGPAKIG-UNONG ang Partido Komunista sang Pilipinas sa proletaryado kag pumuluyo sang Afghanistan sa pagtaliwan ni Comrade Zia, 68, tagapangulo sang Communist (Maoist) Party of Afghanistan (CMPA).

Nagtungod sang yabi nga papel si Comrade Zia sa pagbato sa imperyalista nga pagpasilabot kag okupasyon sang US sa Afgahistan sadtong 2001. Pagkatapos sang tatlo ka tuig, gin-organisa niya ang Unity Congress nga naghugpong sa tatlo ka Maoist nga kahublagan sa Afghanistan kag nagresulta sa pagkatukod sang CMPA. Duha ka beses nga napilian si Comrade Zia bilang tagapangulo sini.

Sa sulod sang duha ka dekada, ginpangunahan ni Comrade Zia ang pagpanday kag pagpatalom sang linya sa ideolohiya kag pulitika sang CMPA. Nagsulat siya sang ginatos nga mga rebolusyonaryo kag teoritikal nga mga artikulo bahin sa mga isyu nga ginaatubang sang CMPA kag sang internasyunal nga kahublagan komunista.

10,000 nagtipon sa base sang CPI-Maoist

NAPULO KA LIBO nga pumuluyo ang nagtambong sa ginpatawag sang Communist Party of India (CPI)-Maoist sa Bastar sa Chhattisgarh State sang Hunyo 18. Naglawig sang tatlo ka adlaw ang pagtilipon kon sa diin nagreport ang Partido sang mga naangkon nga paghiliusa kag mga kadalag-an.

Ginsuguran ang pagtilipon ni Nambala Keshav Rao, ang bag-o nga pangkabilugan nga sekretaryo sang Partido upod ang iban nga mga kumander kag upisyal sang People’s Liberation Army. Gintalakay niya ang mga opensiba nga ginlunsar sang hangaway sang banwa sa lugar kag ginpakita ang mga armas nga nakumpiska sa nagligad nga mga bulan. Ginbalikan man sa pagtilipon ang mga plano sa mga kampanya kag opensiba nga iganlunsar sa lugar.

Ginatantya nga may 300 armado nga katapu sang CPI-Maoist kag 500 milisya ang nag-asikaso sa seguridad sang pagtilipon.

Pagpasidungog kay Ka Jaime Soledad, NDFP konsultant

Ginapasidunggan sang Partido Komunista sang Pilipinas si Kasamang Jaime Soledad (kilala man bilang Ka Mike, Ka Jordan kag Ka Fred) sa iya wala sang duha-duha nga pag-alagad sa nagahimakas nga pumuluyo kag rebolusyonaryo nga kahublagan. Napatay si Ka Jaime sa sakit nga kanser sang Mayo 13 sa edad nga 70.

Pinakaulihi nga gintungdan ni Ka Jaime ang pagkalkonsultant sa sugilanon pangkalinungan sang National Democratic Front of the Philippines halin 2016 tubtub 2017. Halin dekada 1970, isa si Ka Jaime sa mga nagapanguna nga kadre nga namuno sa pagpandar kag pagsulong sang rebolusyonaryo nga kahublagan sa Leyte. Sadtong 2005-2009, napatapu siya sa *Ang Bayan* bilang manunulat kag tagasalhin sa Waray kag Bisaya. Iligal siya nga ginaresto sang 2009 kag nahilway sang 2016 agud magpasakup sa sugilanon pangkalinungan. Nagerbi man siya nga tagapamaba sang National Democratic Front-Eastern Visayas sa panahon sang rehimen ni Corazon Aquino.

Isa si Ka Jaime sa pamantan-on nga nagkadto sa kaumhan sadtong dekada 1970 nga nagerbi nga binhi sa paglatag sang Bagong Hukbong Bayan (BHB). Estudyante siya sa University of the Philippines antes siya nadeploy sa Leyte. Gintalikdan niya ang UP Vanguard, ang organisasyon sang mga upisyal sang ROTC sa unibersidad agud mag-entra sa BHB.